



GElderus ob magnas corporis & animi uirtutes Saxonum rex electus fuit, anno mundi ter millesimo trecentesimo uicesimo. Is classem armis uirisq; instructissimam per totum Gothicum sinum circumferebat, nec solum Cimbro & Danos, sed etiam Pomeranos, Vandalos, Rugianos, Curetes, & Esteones uastabat. Cum autē eo tempore Hotherus Sueonum rex cum Baldero mago ob Nannæ puellæ desiderium bello decertaret, Balderus uiribus inferior Gelderū in belli societatem eloquēti oratione pertraxit. Tanta enim uirtutis opinione Balderus pollebat, ut plerisque deus uideretur. Itaque in Cymbrico Chersoneso

concurrentes, nauali prælio Hotherus uictor extitit. Ibi Balderus timore percitus cum suis aufugit, atque loco pugnae Belliport nomen reliquit. Saxones autem in prælio fortiter perseverarunt, donec omnes cum rege Geldero occubuerint. Itaque hostes huius regis uirtutem admirati, eum magna pompa, atque inusitatis regum ceremonijs, rogo impositum, pro more gentis concremarunt. Cinerem uerò in urnis conclusum honorificè conseruarunt. Alb. Crantz. lib. 4. Sax. cap. 5.